

Nunat Avannarliit Killiit Siunnersuisoqatigiiffiata kaammattuutitut aalajangersagaanut nr. 1/2020-mut Inatsisartut tapersiinissaat pillugu Inatsisartut aalajangiiffigisassaattut siunnersuut:

Nunat avannarliit killiit Siunnersuisooqatigiivisa Savalimmiuni Landstyre, Kalaallit Nunaanni Naalakkersuisut aamma Islandip Naalakkersuisui nunat avannarliit suleqatigiinnermut ministerii suleqatigiinnermut annertunerusumut kaammattorneqassasut, tassani ministerit isumaqatigiissasut minnerpaamik naligninnaasumik ukiumut ataasiarlutik ataatsimiittarnissaq isumaqatigiissutigissagaat Nunat avannarliit killiit Siunnersuisooqatigiivisa naalakkersuisunut landstyrenullu oqaloqatigiinnikkut suleqatigiinnerup siuarsarnissaanut, isummanillu avitseqatigiinnikkut, ilisimasanillu paarlaasseqatigiinnikkut assigisaanillu kaammattuutigineqarpoq.
(Aallartitat siulittaasuat Pipaluk Lynge-Rasmussen).

Akissuteqaat

(Nunalerinnermut, Imminut Pilersornermut, Nukissiutinut Avatangiisinullu Naalakkersuisoq)

Siullermeerlugu suliarineqarnera

Nunat avannarliit killiit Siunnersuisoqatigiit innersuussutaannut nr 1/2020, nunat avannarliit killiit pingasuusut naalakkersuisuinut nunat avannarliit suleqatigiinnermut ministerii suleqatigiinneq annertusassagaat, tassani ministerit isumaqatigiissasut minnerpaamik naligninnaasumik ukiumut ataasiarlutik ataatsimiittarnissaq isumaqatigiissutigissagaat Nunat avannarliit killiit Siunnersuisooqatigiivisa naalakkersuisunut landstyrenullu oqaloqatigiinnikkut suleqatigiinnerup siuarsarnissaanut, isummanillu avitseqatigiinnikkut, ilisimasanillu paarlaasseqatigiinnikkut assigisaanilu siunnersuummut Naalakkersuisut qujavugut.

Nunat avannarliit killiit akornanni suleqatigiinnermi naalakkersuisuusut ukiumut minnerpaamik ataasiarlutik ministerit ataatsimiittarnerisigut suleqatigiinnissamut nukittorsaanissamik imalimmut Naalakkersuisut iluarisimaarinnipput. Naalakkersuisut isumaqarput taamatut ukiumut ataasiarluni suleqatigiinnermi naalakkersuisut ataatsimiittarnermikkut nunat avannarliit killiit ataatsimut unammillernartitaminni, inuussutissarsiorneq, pinngortitaq, avatangiisit, silaannaallu pissusaa pillugit suleqatigiinnerat kimeqarnerulissasooq, taamatuttaarlu nunat taakku pingasuusut ikinngutiginnerannut nukittorsaataassasooq.

Taama oqaaseqarluta Naalakkersuisunit siunnersuutip akuersissutigineqarnissaa inassutigaarput.